

小司馬奏草

小司馬草卷之二

職方稿

題爲仰遵

明旨查議兵巡道以專責成事案呈到部看得巡撫

江西都御史潘 巡按江西御史趙 各題稱南

昌兵備兼管分巡專駐寧州饒州分巡兼管九江

專駐饒郡道里遙遠動屬掣肘要將分巡南昌道

印信交付屯田僉事不妨原務兼管南瑞二府巡

務并省城會操鄱湖防禦寧州兵備僉事另給南

昌兵備關防一顆專飾南瑞二府戎事仍轄瑞昌

兼制湖廣興國通城崇陽劉陽咸寧平江等六州
縣盜情饒州兵備副使卽以見領分巡九江道印
信兼管饒州府屬并星子都昌二縣分巡事宜仍
兼攝新建進賢建德等縣地方兵戎原務九江兵
備副使亦以見領兵備關防兼管九江府屬并建
昌安義二縣分巡事宜及操捕船廠等項原務其
各道

勅書照依今議分理職務增入換給仍各申諭專駐
信地禁止叅謁賠巡各一節爲照責成宜專道里

貴便控馭遼闊則機失於遙制綜理瑣委則力分
於事多所據江西省會襟江帶湖叢山巨浸逋逃
出沒實繁有徒前項兵巡道等務必須分屬得宜
便可詳於督責旣該撫按官都御史潘 等酌議
繁簡均節停妥具題前來相應依擬合候

命下將分巡南昌道印信交付屯田僉事兼管南瑞
二府巡務并省城會操鄱陽湖防禦其屯田關防
仍存該道督理通省并池州府各屯田政原務寧
州兵備僉事改爲南昌兵備另行請給南昌兵備關

防一顆專飭南瑞二府戎事并照原議所轄瑞昌
兼制湖廣興國通城崇陽劉陽咸寧平江等六州
縣盜情饒州兵備副使卽以見領分巡九江道印
信兼管饒州府屬并星子都昌二縣分巡事宜及
原議兼攝新建進賢等縣地方兵戎原務九江兵
備副使亦以見領兵備關防兼管九江府屬并建
昌安義二縣分巡事宜及操捕船廠等項原務其
南昌饒州九江三兵備及屯田道各照今議分理
職務增入責任請換

勅書欽遵行事其屯田道元加兵備衙住袁州給有
不坐名

勅今既兼南瑞二府巡務仍應照前改給另鑄南昌
兵備關防一顆移咨禮部查照鑄給本部仍咨行
江西撫按衙門行令各道務要專駐信地不許越
境叅謁陪巡有妨職業等因萬曆伍年拾貳月初
六日具題初八日奉

聖旨是

題爲積年劇寇區威向化并議撫處事宜以久安地方事案呈到部看得兩廣督撫巡按等官凌等會題內稱廣西梧州府屬岑溪等縣六十三山七山邪留連城等處俱與羅旁接壤徭獍聚爲患多端據各被害乞告剿除方以大征羅旁未暇兼舉差官賁文曉諭各賊畏威求撫賊首潘積善等赴道受罪願歸所占田地納糧編差隨委知縣葉詩等親往各山查明田地編派糧差仍將潯梧叅將移住岑溪桐州府原有靖夷營募兵六百名專

歸統領其廩糧工食悉照舊規又謂道理遼遠控
制難周七山爲蒼藤岑要地連城爲羅定信宜岑
溪諸徭嘯聚之藪六雲爲容縣北流中衝北科爲
六十三山咽喉之處懷集縣與賀縣爲界五里村
山徭賊出此出沒議設指揮千戶五員於各地方
分兵劄營屯守暫選梧州等衛所指揮等官李汝
賢等五員各令派定信地立營坐鎮將蒼梧各縣
原設防守額兵三千九百七十七名每官一員撥
軍六百名聽用共三千名餘下九百七十七名選

留六百名將三百七十七名汰去內將汰去兵糧
增給營兵每月通支糧銀六錢其新設官五員每
員每日給廩給銀一錢二分紙劄諸費每季給銀
三兩俱於梧州餉銀內支給其各官兵俱屬叅將
調遣叅將原領

勅書換給各指揮千戶分屯五處務守信地用意加
撫不許生事如有乘間竊發或徑自擒捕或互相
應援及有已撫復叛聽其相機剿除七山等處指
揮千戶五員以後載入軍政遴擇指揮任用如指

揮不足以千戶補數仍帶署銜著爲定規及稱剿撫功同而賞格未載欲要比照剿賊有功事例將分守蒼梧右叅政王 僉事王 首叙廣東嶺西右叅政蔡 兵巡副使徐 併叙酌量陞賞各一節照得止戈爲武不貴殺降所據梧州府屬六十三山等處猺獞負固不悛罪應殄滅今督撫等官凌 等因羅旁破竹之勢察諸巢危笞之形分布甲兵欲行征討乃申以文告示以德威上賴

聖武布昭

天心悔禍賊酋潘積善等輸情伏罪捧檄請囚納土
歸氓制挺受撻知縣葉詩等按閱圖籍收隸版章
約法已明款輸不爽又慮非我族類逆順無常酌
議潯梧叅將王德懋移住岑溪往來調度暫委指
揮李汝賢等分據要害劄營屯守旣足以奪其再
逞之私又可以防其未然之變俱爲得策願惟百
粵地廣賊繁有徒反側弗寧積有年歲今乃不假
兵車歸氓式化任事諸臣功勞茂著自宜優錄不
可泥于故常但剿除撫定力有難易創謀乘勢有

後先所據叅政王 僉事王 同心體

國好謀有成坐收不戰之功委應首叙叅政蔡 副
使徐 憂切震鄰義效共載大彰遙擊之威委應
併叙既經督撫等官凌 等題請前來相應議賞
但得箕發謀雖有各道而集思廣益寔在督撫今
總督兩廣右副都御史凌 畢收群策獨展壯猷
不以成功自居不因勝兵務殺餘威震於遐方而
傳檄自定勝算及於永久而處置咸宜巡撫廣西
右副都御史吳 心力協濟謀斷相資震掎角之

威而緩急有賴贊輔車之勢而唇齒互依雖口不言功本人臣酬報之義而論功行賞寔

聖朝鼓舞之權尤當大加褒叙以酬勞績者也合候
命下本部移咨總督兩廣右副都御史凌 及咨巡
撫廣西右副都御史吳 查照所議通諭各巢匪
獍待以不死許其自新如復乘間竊發已撫復叛
定行調兵盡剿再不姑息其見任潯梧叅將王德
懋改住岑溪地方本部查照今議事理改擬責任
換給

勅書賫付本官欽遵行事原領

勅書徑自

奏繳其七山連城等處暫委指揮千戶李汝賢等五員各照前擬地方分兵劄營屯守應給廩糧等項俱如所議施行若果撫馭有方不妨加陞久任其五屯守官職以後載入軍政遇有考選之年照例遴選如指揮不足以千戶補數其千戶官仍帶指揮署銜不與世襲永爲定例如有安輯各巢者聽撫按官奏薦破格錄用如或撫馭無策亦聽徑自

叅革另補叅政王 僉事王 各陞俸級叅政蔡
副使徐 重加賞賚至督撫等官凌 等應加
錄叙仍候

上裁欽遵施行再照政畏張急理善烹鮮刑新之法
所輕典安遠之計利用薄征况各徭獍從無禮義
化訓之素不堪約束兵將之煩今旣攝以武臣必
須撫循得策俾其知從化之樂悔跂扈之愆方可
未安反側長保無虞若使統馭乖方嚴刑重斂則
今日議撫之功不免爲他日用剿之累非所以尊

國威而懷遠人也併候

命下轉行該省督撫官通行司道總叅府縣文武各
官務要加意撫字薄示羈縻嚴戢官兵秋毫不犯
毋得過爲苛切以開釁端亦不可曲爲因循不加
防範等因萬曆五年十二月初八日具題初十日
奉

聖旨這各徭徭旣畏威伏罪姑准赦宥着傾心聽撫
遵奉約法如再作惡撫按官奏來定行調兵剿除不
宥各地方官撫處有功凌雲翼賞銀四十兩紵絲四

表裏吳文華三十兩二表裏王原相王一卿各陞俸
一級賞銀十兩蔡汝賢徐時可賞銀二十兩還都著
吏部紀錄其餘俱依擬欽此

題爲竭愚惴陳末議以仰裨

聖治事案呈到部看得吏科給事中鄭 條陳五事
除事干別部者行自議覆外所據重邊臣以豫備
兵食一事內開北虜款塞有年今當乘時整飭預
足兵食全賴邊臣得人欲得邊臣遠大之功有三
一則擇之不可不破常格一則任之不可不出常
調係隸吏部掌行另行查議其謂賞罰不可不革
常套一節爲照勵世之權莫先賞罰其於邊鄙尤
所當先攷之律例及連年議覆功賞罪罰條縷甚

明數十年來不無僭濫故有一捷七封兩人四伯
則賞不當功制臣逮係債帥逋誅則罰不當罪往
事明徵足爲鑒戒誠有如科臣所議者卽今明良
一時賞罰公信邇者本部會題

恩例覆奉

明旨慎重爵賞之意詳且盡矣但北虜互市本屬羈
縻所在修戰修守何嘗一日可緩顧惟居安慮危
治世不廢信賞必罰議貴精詳所據科臣具題前
因良以開府專征與建節稱帥者勞逸不同決機

制勝與披堅執銳者難勿有間故論功則以武臣
血戰爲重文臣次之論罪則以主將爲重守巡偏
裨議之俱爲有見但親冒矢石者利害切身而發
蹤指示者成敗攸係其有重大邊情文武各官均
有委任旣與同其功則不得不與同其賞一體錄
叙似不爲嫌其他零斬捕獲修築効勞文臣委應
次叙若挫失誤事則主將爲先兵備偏裨部曲然
亦各有專責必須酌議定罪不當獨坐督撫等官
尤爲確論至於綜覈功罪先以督撫詳以按臣預

防虜患貴在得人務足兵食諸凡誤謬聽令科道官叅劾俱于邊政有裨相應依擬合候

命下將各邊武臣今後如有臨陣殺賊者不拘職分大小照例論功陞賞若總督巡撫等官調度功同者一併論叙其餘隨事効勞無大關係者不得一槩同叙若地方疎虞罪先主將下至守巡偏裨及部曲隊伍各有專責者細加查覈議擬定罪其餘悉如所議施行再照思賞而奮具臣所恥畏罪而強志士不爲前項所議規條祇爲磨鈍之具其各

督撫大臣掌專制之權寄封疆之重自當盡忠報國隨分竭誠况功罪載于冊書臧否逮於苗裔有不當以計功邀賞亦不可以畏罪規避至于卓異奇功非常敗挫則

國憲具存又不可以文武拘不可以崇卑論者併候

命下仍移咨各邊督撫等衙門知會施行等因萬曆五年十二月十二日具題十四日奉

聖旨是欽此

題爲行查武職履歷登註將材以便推用事職方
清吏司案呈到部爲照幅圓廣大衛所繁多大小
職官同姓同名不知凡幾本部推用各官惟據總
督撫按等官疏薦下部分別衛所職名登記查考
必須原題開列明白履歷備細登記無誤然後陞
用不差所據衛所姓名重複前項所開欸目難以
悉數若不備行查明倘或推選有誤咎將誰歸旣
經該司具呈前來相應題

請通行備查著爲定例遵行恭候

命下本部移文南北直隸十三省及宣大山西薊遼
保定延寧甘固各該總督巡撫衙門及移文都察
院轉行各差御史備查各屬武職先今經薦官員
要見某人係某衛所何等祖職及武舉名色納級
等項出身世襲指揮明開僉事同知使職千百戶
鎮撫明開署試實授聽用廢閑官員仍開先任某
處某官因何革任及有緣事失事提問已結未結
照前開列出身至于異省剋勞者經何衙門取用
卽今果在何處改調衛所者先何衙門食俸本籍

職名有無除革因事降級者曾否陞復罰俸住俸者曾否開支逐一速查詳悉開具造報以憑註簿推用庶免差誤嗣後各該督撫按官循例舉劾照
今

請明事例仍造青冊送部併乞容令本部查各省直
地里遠近刻期限報以便責成等因萬曆五年十
二月十四日具題十六日奉

聖旨是欽此

題爲夷情事案呈到部看得總督宣大侍郎吳
題稱順義王俺荅帶領把漢那吉等委果西行留
下管事頭領照常

進貢近差夷使遍書欲早發貢賞及討通事二人
護送西行以免西鎮生疑以便鈐東部落仍議圖
戰守以使之畏威慎撫處以使之懷惠大同巡撫
鄭 稱虜王於十月間離巢西行是的等因爲照
互市之舉本屬羈縻戰守之防自當脩預所據虜
酋離巢西行名雖請佛然其爲套虜復仇與西戎

仇殺之情實爲有之若彼之行徑出甘州之西北則與我邊界遠不相干若其南行則經我邊境不過百里所當戒嚴卽彼以善行非叛盟渝約懷詐欺我以圖一逞者比而經過地方防禦機宜自合有備該臣先任總督及科臣題議本部覆奉

欽依通行欽遵訖今該督撫官吳 等的據夷情奏稱前來合行再加申飭恭候

命下移咨各該督撫衙門卽便行令大小將領等官嚴加警省以備不虞在甘寧延固沿邊地方如遇

虜王經過處所務整兵設伏嚴爲防守一面選差
官通傳諭虜王恪遵前盟禁戢部落毋得剽掠騷
擾生事如有違犯照例罰治如果虜番互相讐殺
只當按兵自守觀其成敗其遇虜王所過量行撫
賞宴犒所討茶篋似難准給其各把守官軍務要
密加隄備不得虛自張皇致生虜疑若或負盟逞
詐卽當相機戰守毋得觀望畏縮縱寇爲患在宣
大山西勿以虜王西去爲安當以部落尚存爲慮
凡一應互市撫賞事宜恪守常規毋失信義仍須

密察虜情愈加防範嚴禁將士毋得輕肆凌侮自
啓釁端其餘修邊練兵一切制禦之圖尤當萬分
整飭再照北虜西番非我族類今雖奉佛終不可
保其間陽順陰逆之情難保必無今旣不可不防
其西去又不容不察其東歸日後迎佛回還尤當
加意隄備大修戰守方可不墜計中其餘各鎮未
盡機宜悉查照本部原行防撫事理施行等因萬
曆五年十二月十八日具題二十日奉

聖旨是欽此

題爲虜王率衆西行乞

勅當事諸臣嚴戒備預撫處以固疆圉事案呈到部
看得巡按直隸御史黃 具題前因率謂俺荅果
於西行所遺部落尚多雖經申明禁約但黠虜狡
詐靡常其中乘間竊發者難保必無乞要申飭兩
鎮督撫等官嚴戒預備撫處及稱宜大通官與俺
荅習熟夷情甘肅素不相通宜遣宣大通官二人
先至甘肅聽彼督撫衙門差遣徃來使虜情皆得
預知而亦可免騷擾之患及稱市茶之類有不可

從各一節爲照虜王西行近該大同督撫官等具
題與夫防撫事宜已經本部條議去後今該按臣
復有此疏大畧相同但合再行申飭無容復議所
有預遣通官赴甘肅應用一事誠爲有見及查近
該督臣吳 題稱虜王書討通事二人護送西行
以免西鎮生疑以便鈐束部落已爲得策今該前
因相應酌議恭候

命下移咨宣大山西及甘寧延固督撫衙門將虜王
西行防撫機宜及市茶禁例查照先次題行事理

着實遵行宣大督撫衙門申誠原差通官二人前
至甘肅會同陝西軍門所差通事人役同在虜中
往來傳諭申彼此之情釋疑懼之意仍須密察事
機探報的實庶撫禦不失先事有備等因萬曆五
年十二月二十八日具題三十日奉

聖旨是欽此

題爲恭際明時罄陳愚悃以仰禪

聖治事案呈到部看得刑科給事中姚 題陳修邊
防等三事均爲邊務軍機除暴安民有益合就開
立前件議擬上

請定奪 計開

二曰修邊防

前件臣看得本款所陳內除錢糧收放招買侵冒
事宜係隸戶部議覆外卷查先該宣大巡按御史
陳 題嚴例限以定市馬內稱宣諭備答鈐束各

夷務要臆壯好馬三鎮約以二萬爲率又該山東
道御史柴 題議互市以防北虜內稱貢馬瘦弱
責軍朋領償價不堪今後約以成數不得額外加
增又議番休以馭南兵本部覆議備行薊浙督撫
衙門諭以番休之法永不召募浙中又查得兵科
都給事中裴 等題飭春防事宜內開薊鎮南北
之兵互相讐怨行令各該將領善爲撫處俱經覆
奉

欽依通行欽遵外爲照貢市之設本屬權宜召募南

兵所以實薊其間長便事宜節經言官建白要在
當事臣工實心幹理而已今該科臣論奏莫非思
患預防深意相應依擬申飭令無備行各該督撫
諸臣在宣大陝西貴州監市員役宣諭俺荅諸酋
令其鈐束部落務將臆壯好馬依期交易市價悉
照定額不許數外求增所在戰守事宜各要整頓
料理在薊鎮行令各該將領毋分南兵北兵一體
優恤至于衣糧額數原有成規主客雖異多寡宜
同在土著者不得過刻召募者不得增多又當時

加曉諭令各相安如遇南兵闕伍卽將精健土民充選毋復再行遠募况招選南兵原非得已今各兵士從戊年久安心樂役者固多亦有繫念鄉土有父母妻子之思者或畏法令不敢言歸又有一等狡猾之人本無勇藝徒以便捷詭譎虛習末技託名從軍冒支糧餉呼朋引類導利宣淫所謂不勝煩擾正以此也合行申明該鎮凡南兵之思歸者量行資遣寧家卽召本鎮精壯以補其闕其有奸猾冒餉無益實用者嚴行查革仍俟

命下行文督撫轉行該鎮各將領知會施行伏乞
聖裁

四日飭軍政

前件臣等查得隆慶五年十一月內該巡按御史
馬 條陳重職任以責成效一款本部覆議通行
各該布按二司清軍右布政副使官各分定屬府
一半照依分巡分守事例按月巡歷其府州縣正
官督同佐貳等官同心清理如有未及分數者聽
清軍御史指名叅奏比照錢糧未完事例遞加罰

治清理有法者分別獎薦覆奉

欽依通行去後爲照清軍之法內有冊籍以憑綜覈
外有專官以理勾補刊成條格法亦密矣但所在
不察奸弊貽害日滋奉單勾取則里書貪求解丁
應役則衛所剝削徒有虛名全無實用該科深酌
弊端謂其責任未專之故考之先題事例大畧相
同若使着實舉行何至行伍缺乏今據論列前來
相應依擬恭候

命下移文各該撫按通行申飭各管清軍官員務要

稽察奸弊以臻實効其一應清勾事宜及五年一
差清軍御史悉照舊例施行伏乞

聖裁

五曰弭盜賊

前件臣等查得近該江西撫按官潘 等題稱廬

陵縣盜賊行劫當被保甲鄉兵擒獲本部覆奉

欽依通行各省一體舉行去後爲照弭盜之法莫善

于保甲節經建議久已通行所在地方官司自當
奉行惟謹間有徇於因循不加整頓司捕者旣不

能緝獲以除奸司察者又不能窮詰以止暴致寇之端未必非此况據江西前事保甲之驗又足徵矣今該科臣論列無非先事慎防時加警策之意相應申飭合無備行省直撫按衙門行令各屬地方等官務將保甲之法嚴行修舉如一家被盜衆則救之一人行盜衆則攻之比閭族黨之中寓伍兩卒旅之意苟有吳越不關守望不助遇寇而閉戶不聞知寇而不行覺發各坐應得罪名至于巡捕巡檢等官務要各專捕察不許營幹差委避事

畏難江山險僻之處多爲盜藪務要嚴爲防範任
俠浪閒之輩多起盜心務要嚴爲禁戢其有循良
之吏能化強梗者撫按官特加優薦悉如所議其
竊盜徒犯仍行發驛擺站別項徒犯照例充工尤
爲要論但係干刑名事屬法司不敢輕擬仍移文
刑部徑自覆請施行伏乞

聖裁等因萬曆五年十二月二十八日具題奉

聖旨是欽此

題爲春期已屆慮患宜防乞

勅各邊預行申飭以仰裨安攘大計事案呈到部看
得兵科都給事中裴 等題稱春防在即乞要通
行申飭各邊大率謂虜王西行遼左多警在甘寧
諸鎮當於所經道路設伏撫處尤要禁絕茶市隄
防番族在宣大諸鎮當慮主酋既去部落恐無約
束更宜經畧備禦倍常加謹在遼左當防土蠻窺
犯督率待戰不得輕許貢市其勾虜屬夷長昂等
亦宜相機懲創各一節爲照春氣漸融虜馬易逞

夷情軍務均當先事預防今該科臣條議前因無非制虜安邊之意相應依擬合候

命下本部馬上差人移文各鎮督撫大臣轉行各該文武將領查照前項題議事理着實遵行加意隄備內修戰守外示羈縻遼左則示以必戰之形奪其要挾之意薊門則慎固封守杜其狎侮之心宣大則申明恩信使居者無攜貳之志甘寧則嚴設防範使行者絕窺伺之奸其他番族部落糾虜屬夷當處置得宜共圖寧謐此外一應機宜及臨

事互相應援調度節年題議甚明通行查照遵守
不得因循誤事等因萬曆六年正月十二日具題
十四日奉
聖旨是欽此

題爲嚴緝礦徒以安地方事案呈到部看得山西撫按官右僉都御史高 等具題河南汙池等處人民聚衆隔盜省礦隨行調集軍壯驅逐捕 剿當卽解散尤恐各徒仍復潛來乞要轉行河南撫按等官一體嚴禁一節爲照河南山西及陝西地方題督密邇境界相聯陝西永盧汙池等縣又與平陸垣曲夏縣爲隣所在諸山盤據產有礦砂三省亡命之徒資夏縣等處之食以爲依本處居住奸民又藉礦徒之勢以爲利憑險作奸貽害地方先

年二省賊徒併糾陝西盜礦行劫爲三省之限隔者僅一黃河而各處渡口四五十所今乘寒泆冰合渡凍而來勢所必至查得舊例禁人私渡打毀筏船仍令委官於各渡口盤詰訪緝洞主勿令影射窩藏亦爲良法邇來法紀漸疎奉行少怠以致彌聚成群漸不可長所據該省撫臣司道等官發慮運謀調集兵壯驅逐解散地方無虞勤勞爲最但前項奸徒未遂初心兇利竇未塞勢必再聚求逞既經撫按官高 等酌議前來誠爲弭盜安民

之計相應依擬合候

命下本部移咨山西巡撫衙門查照所議將前項礦賊申明禁例嚴爲防緝仍一面行文河南及陝西撫按官督行守巡兵備各道嚴行臨河近礦軍衛有司掌印巡捕等官嚴加防守遠行哨探前項礦徒如有結聚務要協力同心會兵剿逐効守望之助嚴渡河之防不得以地分彼此互相推諉仍申明保甲設法稽查省諭各鄉村山谷居民不許仍前結聚越境盜砂自取誅戮若有推委致有失事

者重治以罪等因萬曆六年正月十二日具題十
四日奉

聖旨是欽此

題爲議修輓券空心敵臺以永固孤懸重鎮事案
呈到部看得巡撫延綏右僉都御史宋 題稱萬
曆六年應修輓臺二百座合用工料銀兩不等內
榆林道七十五座神木道五十座俱每座該銀二
百兩靖邊道四十五座定邊道三十座俱每座該
銀二百二十兩通共該銀四萬一千五百兩照依
戶七兵三事例早賜給發一節爲照延綏一鎮分
爲四道地方所產柴炭灰石難易不同價值亦異
原議給價分爲兩等所據六年應修臺工銀兩旣

該彼處巡撫官酌量分派停當具題前來相應依擬合候

命下移咨巡撫延綏宋 即將六年應修臺二百座
候值春融就便興工合用銀四萬一千五百兩照
戶七兵三事例本部該出銀一萬二千四百五十
兩於太僕寺馬價銀內戶部該出銀二萬九千零
五十兩於客餉銀內各動支聽該鎮巡撫衙門差
官領發前去分給各道收買料物扣省鹽菜等項
支用完日備將修過磚臺用過銀兩造冊

請行巡按御史覈實具奏耳照安邊之策設險爲先
墩臺之設止資耳目舊制沿邊或五里或十里乃
設一座每墩守軍多者六七人少者三五人惟以
傳報烽火瞭望煙塵非可據以守也該鎮造臺多
至八百餘座悉以磚包石砌似爲保障之計但工
程浩大邊塞貧寒先年修築邊牆軍士之力日已
困竭似當加意體恤曲從寬省以安人心前項臺
墩工程雖有定議而審時度勢不妨酌議裁省使
三軍之士力常有餘庶裨戰守矣等因萬曆六年

正月十三日具題十五日奉

聖旨是銀兩准給發欽此

題爲懇乞

天恩憐恤死難超救寃獄事案呈到部看得巡按福建監察御史商題稱查勘過原叅見監百戶白麟見賊入城奉頭鼠竄據律問斬夫復何辭但查賊由南門攻入原非信地應從末減二子報效贖父均各陣亡情有可憫似應破格議處一節爲照犯人白麟先因倭賊攻陷縣城已經問擬斬罪續據本犯奏辯前因隨該兵科叅稱該犯所奏情似可原但當時分管信地果否與縣城無干二子立

功贖罪果否並戰陣亡均無的據抄宜查覈等因
又經備行彼中查勘去後今該巡按福建御史商
勘明具題前來照得本犯原駐白鶴嶺隘物無
城守之寄既一經調入縣城則守備之責似無可
諉今致失陷城池擬斬非枉但查本犯調委協守
西北而賊徒襲入南門則失事之由原非信地先
擬親斬部斬俱各數多紀驗已明未經叙錄議功
論罪本屬可矜今其子生員白受采等投訴官司
立功贖父乃各捐軀赴難視死如歸雖請纓之志

似屬未酬而緹紫之情大有可憫况恤錄陣亡既
可以世延其子褒慰忠孝似可以上逮其親既經
按臣查勘明白相應酌處但事屬異常例應奏
請律條比附隸在法司本部不敢輕議合候

命下將白麟前事移咨都察院查議上請

定奪其子孫應否恤錄承襲仍候通詳科斷施行
伏乞

聖裁等因萬曆陸年正月拾叁日具題拾伍日奉
聖旨是

題爲拏獲達賊姦細事案呈到部看得陝西巡撫
董 題稱潼關河西各道拏獲達賊姦細周滿成
蒲帶帶子王保鎖供稱俱係漢人被虜近該頭目
王邦實吉哥兒各差部落共有八人由鎮靖堡進
入躡探

南朝消息乞要將見獲各犯問擬如律及失於盤
詰員役一併提問招叅有功人員併議陞賞與其
餘未盡情節另行查明奏

請定奪仍欲

降勅明示俺答堅守盟誓即將吉哥兒王邦實照依
彼中夷法處治一面行各邊整兵隄防一面嚴禁
邊外樵採牧放如民間所需亦要懸木牌定擬月
日辰出酉入各一節爲照陝西四鎮俱與虜鄰未
曾納款之前中土之民被其擄掠不可勝數甘心
向虜者固多思歸潛逃者亦有先年邊政廢弛招
之使來者或殺以報功或指爲姦細置之死地遂
使陷虜之人永絕來歸之念而虜人因得假此以
恐脅之已非一日之故矣近自款貢以來夷心頗

定華人思歸本部見有歸正事例如遇虜中走回
人口差人伴送原籍官司給親隨住照例免差如
失迷鄉貫者俱准收充通事給贍撫恤每年各鎮
奏報者多至百數少至數十所以昭

中國之威信而杜邊釁也今據周滿成等若果其
心投虜爲之驅使潛入境內探聽消息則罪在不
宥死有餘辜但查各犯初覆招詞前後互異兼之
供有籍貫况王保鎖又有親父王爲在官中間情
有可疑事干人命邊情舉動貴宜詳慎不妨再加

覈審使委心於虜者聞風知懼慕義來歸者獲保
生全方爲兩得合候

命下移咨陝西督撫即將周滿成等再三研審務求
真情不得拘泥成案致有枉抑如有不實即從未
減其未獲人犯嚴督各道緝拏若果別無姦計姑
照前例應發原籍者伴送著籍應收通事者一體
撫恤以示懷集之義至于夷夏之防出入之禁自
當時加譏察不可少有玩怠况經據有前因即宜
通行陝西四鎮撫臣着落大小將領把守關隘用

心防範盤詰其民間樵採懸牌出入定擬時候尤
當嚴行查考至于

降勅俺答事關國體未可輕率致虜疑笑仍將審釋
過緣由處治等項具奏

定奪施行等因萬曆六年正月十三日具題十五日
奉

聖旨這本說的是依擬行欽此

題爲秋防事竣薦揚年勞久著大將以重邊備等
事案呈到部看得薊鎮督撫官右都御史楊 等
具題各一節除楊壽甫見經法司提問已應革任
聽其問理孟杰上年查係耳聾難以附簿備用李
信近方改正遊擊亦無容再議外爲照薊昌二鎮
拱護

京畿

陵寢關係匪輕連年建議修築各官効有勤勞例于
秋防畢日通行一次叙論所提總兵官戚繼光謀

斷兼資楊四畏廉勇素著綜覈修守勞瘁俱多簡
練戎兵勲猷並著資望已深懋寵優加似亦非濫
但查二臣俱於四年冬閱視論功已膺賞賚迄今
甫及年餘似于原議三年之例未合難復議

請副總兵等官史宸等亦皆與有勤勞俱應紀錄其
餘戴罪效勞各官服勤歲月久近不同原犯罪情
重輕亦異今該鎮憫恤勞苦請爲開釋以彰宥罪
之仁本部酌量等差待積年勞以公使過之義內
如尹湘以修臺無功降級王鉞以科歛調衛立功

董一元李如楨以倒馬住俸降級况馬各已補完
張爵以革任復用俱於功過得準朱壽原降祖職
三級劉楫以失事開伍叙用止及兩年楊秉中以
犯贓降祖職二級復用仍須耳歷歲月方可准復
原職除同李幹經保數次累著辛勤合候六年終
邊功再議金科王如龍吳嵩崔廷威張文魁軍罪
止於終身效勞之日尚淺趙嵐張四教高如桂所
犯求軍非有軍功不贖武振係干重辟尤湏照例
獲功奏

請高仲以小肯被誣原由錦衣衛調任已經保薦二次况兼獲有軍功合照陞職改調在京別衛更須再積年勞另叙楊爾干近該本部別叅降祖職一級仍行革去管事其餘更調及叅論等官既該督撫官楊等會題前來通應酌擬合候

命下將戚繼光等俱附記在簿酌量循資推擢董一元開俸李如楸張爵復叅將職銜尹湘復級王鉞回原衛高仲仍照功陞職級調回京衛劉從武以原職調管司馬臺提調事務張士選調昌平管河

兼守備鞏城地方本部備查原擬責任行令各官
欽遵行事李宗召安廷燦張允嘉俱行革任回衛
帶俸差操不許管軍管事霍貢黃奇革任聽調腹
裏別用楊爾干照本部先叅發落施行其楊壽甫
革任候法司提問發落遺下各員缺另行推補再照
各鎮舉劾秋防官員內除見任及本鎮衛所各官
職名俱有文冊可據其餘各省在鎮効用等官既
經薦保紀錄待遷但各官履歷未詳不便推用併
候

命下移咨各該督撫及移文都察院轉行各該巡按御史照依近日題行事例將前項各官出身履歷緣由作速備查咨部以待推用施行等因萬曆六年正月十七日具題十九日奉

聖旨李宗召等着革任回衛其餘都依擬欽此

題爲承平日久邊備漸弛懇乞

聖明乘時破格議處以資戰守以肅疆場事職方清
吏司案呈到部爲照制虜安邊在于有備設備守
國尤貴及時大率言邊事者不過戰守二端先守
後戰事理必然苟行伍不充器械不利甲冑不完
不可以言戰險要不據城堡不修濠塹不濟不可
以言守所據撫臣高 開列十有二事大較有

裨戰守相應酌議但建置興作在慎始計熟思審
處可無後艱今據各款內除區畫已詳徑宜施行

者依擬上

請外其有意慮各別聞見異同且事在彼中難以遙度者就于原列款中附以本部意見備行督撫衙門會同從長計處務期有益邊方以圖實効令候命下移咨酌議具奏施行等因萬曆六年正月十八日題奉

聖旨是山西武備久弛高文薦旣統意振作凡戰守事宜有該及時整飭的還着與總督衙門計處停當具奏舉行欽此

計開

一布兵馬以資訓練

前件臣等看得兵貴足用不貴偏多今據所議該鎮三路奇兵以下多寡相懸緩急無賴劑量損益務足三千二千之數誠爲有見但各路軍兵土著城堡與召募調發者不同况諸城堡相去有百里者有八九十里者安土重遷人之恒情廬舍墳墓各有故業今欲改隸別營威令所加何慮不從但恐旣分之後人無固志不免逃亡逃亡若多守備

益弱莫若准照所議以近就近分派各營仍居見
住城堡平時則往來訓練有事則調發從征庶於
軍情兩便但事在彼中有難懸斷恭候

命下仍移文山西督撫衙門將前項所議各營補派
設官分管及撫臣添隸標兵量增行糧并分等訓
練諸事一一會同斟酌俾妥具奏伏候

聖裁

一議駐守以扼要害

前件臣等看得關隘險夷雖有定勢緩急衝僻亦

各因時其有先稱衝險而今則可緩者不妨改移
亦有先雖夷僻而今則當急者尤宜整頓所據更
置添設各路城堡及補足軍數俱于戰守有裨但
查賈家堡地隸大同堡屬山西說者謂爲偏老門
戶彼此聯絡互爲掎角偏關逼隣虜穴板升叛人
不時窺伺先年設有總兵鎮守今已改駐寧武若
又將守備移住滑石澗堡本關整兵五百統以指
揮撤舊增新更易非小至於合用軍數欲於逃故
內召補恐難即完不濟實用况賈家堡在大同山

西之間又當會同該鎮與督撫詳議相應備行山西督撫衙門將前項應更置應添設應裁併者一會議停當具奏施行伏候

聖裁

一精衣減以壯軍威

前件臣等看得兵家自衛在於甲冑甲冑堅固則士氣振揚今據所議明甲臂手委應完備以壯軍容但合用鐵炭紬布工價爲費實多今所議鐵料甲價六錢三分五厘臂手九分無非節省多費之

意識恐委官支用不足又滋科歛加減之弊合行
山西督撫衙門行令各道督同該路將官照議再
行酌處價值製造務要堅固精好無爲觀美亦不
得科派軍士致生怨咨其有減剋料值無益實用
者查照叅究問罪施行伏候

聖裁

一查器具以備衝突

前件臣等看得制勝之具火炮爲要或戰或守均
不可無今據所議前因委於戎機有益合無備行

山西督撫衙門轉行各道行各該守備將前項器具照議支銀買料如法置造以資應用但

中國長技用之在人打造貴精演習貴熟至於邊關又當嚴禁出入不許傳法製造庶爲有益伏候

聖裁

一查水泉以嚴隄備

前件臣等看得機事貴密好謀務成今據前議水泉去處收礮應用將以禦虜畜牧絕其駐屯臨期行之亦是一策內除收買價值分給聽用等事相

應依擬但出奇行計兵機所係未發先露不免害
成苟利軍機何惜鉅費專制閫外便宜可也併候
命下移咨本鎮慎密施行伏候

聖裁

一栽樹株以固藩籬

前件臣等看得平原曠野虜易馳驅密樹深林騎
難奔突今據所議廣培邊木事亦可行但於膏壤
沃野樹之易成若邊地砂磧瘠薄鹹鹵千里之遠
有寸草不生者况種樹乎查得別鎮先年亦有行

之者徒爾勞人終成畫餅况今閑暇設險練兵當
務者多工程通完軍伍充備徐議可也伏候

聖裁

一議用人以祛風蠹

前件臣等看得軍必擇將將在得人統御非人重
爲軍累所據官少事煩委用不足專於附近選任
遂致濫及凡庸今欲不分地方通省遴選委爲得
策合無備行山西督撫衙門今後委用防邊官員
不拘邊方腹裡務要查訪才能及素行廉潔者即

坐名定委其奉委官員亦不許畏難規避至於考選軍政疏薦陞遷等項俱如所議施行伏候

聖裁

一修邊城以嚴保障

前件臣等設險本以守國而力役難於並興今據所議輒包老營堡等城伍座土築古計溝利民水池堡二座及陽方口盤道梁邊牆二處及時修築委於防守有益但工程浩繁有難逕度刻期定費不妨致詳合無備行山西督撫衙門將前項事宜

細加議處具奏

定奪至于所議各役鹽菜行糧量地方之衝僻以
定有無酌工程之緩急以爲多寡非不當矣但塞
上軍壯類多貧難一行赴工更無他措必須量加
優恤況查近年各邊修築事例間有不同不妨再
加酌量稍爲增益俾其樂於趨事忘勞忘怨再照
朔漠之地土多砂礫掘深溝池方及塊壤今計牆
堡垣墉必須根基深廣基廣則難傾根深則難圯
仍候備行修築處所務要廣大基址深種腳根寧

使寬其程期益其工料不可就於土面浮沙上累
磚石至於先年所議修築牆堡或有築而未完者
務須催督完而漸圯者務須整理毋使前功就隳
方有實効伏候

聖裁

一葺墩堡以便收斂

前件臣等看得堅壁清野所以剗虜若使墩臺不
完屯堡不固何以團聚軍人收斂牲畜今據所議
委於防守有益但禦虜保民城堡爲急墩臺不過

明瞭望傳炮火非可據而守也今欲修築當先城堡其空心墩臺無益戰守者不必興修勞軍傷財惟將舊設瞭望等臺量爲幫修可也合無備行山西督撫衙門通行各道嚴督所屬各官將前項三道所屬先今應修城堡及時興工各照原議年限陸續完報以憑查考軍民屯堡五座俱如議修築歸併其餘規制丈尺合用軍夫等項悉如所議惟口糧鹽菜仍候會議併行伏候

聖裁

一濬壕塹以設險阨

前件臣等看得溝渠之設所以爲固地險能據可以制人今據所議無非修備禦以圖萬全之意合無備行山西督撫衙門轉行各道嚴督所屬各官將前項應挑壕險應斬山梁候各邊工完之日次第舉修不得並興工役以滋將領各私地方占軍影射之弊其合用軍夫等項悉如所議惟口糧鹽菜仍候會議併行伏候

聖裁

一明賞罰以勵人心

前件臣等看得板築興作委任貴專刻期成事賞罰貴當今據所議無非專任責成務求實効之意但事宜可久法貴可行邊地沙土易頽磚鹹易壞若以三年十年爲限尚行追究則人情實難法將終廢合無備行山西督撫衙門嚴行該道將前項副叅遊守州縣掌印等官隨地分委責其成功若土築工程未及二年至于傾圯磚包工程三年之內至于倒塌或有甲冑不堅器械不利者文武官

計罪定罰重則降級輕則罰俸其邊堡工程果能
堅固兵甲修造果能如法使營伍改觀戰守足恃
者候閱視大臣勘有成效該道叅將及守備以下
俱各出格陞賞施行伏候

聖裁

一查錢糧以計贏縮

前件臣等看得足用安邊本於積貯設險立守寧
可惜財所擬各項諸費通計用銀七萬五千七百
餘兩米四萬八千三百餘石先儘該省無礙存積

官銀五萬二千八百餘兩米二萬四千一百餘石
及動支平潞二府積貯民屯銀一萬五千兩其餘
不給借用客餉銀二萬六千五百有奇不增益於
額支不請給於

內帑通融計美可謂當矣但邊方廣儲所以備虜
修築經費亦有恒規以全晉之地當胡虜之衝况
地瘠民貧天災不測存積無礙之銀所以備不時
之用似未可以盡動也合無前項無碍官銀止給
二萬兩其不足者仍候會計停妥估筭明白於積

下客餉內量支再有不足不妨照例題

請於戶七兵三事例給發見在米穀陳陳相因者照
議支給但石城湯池非粟不守邊方積貯貴權重
輕若食不足而銀有餘則緩於積銀而務實倉廩
若食有餘而銀不足則緩於積食而蓄用錢糧所
擬前項米穀雖是朽腐不堪倘使盡行給散倉廩
空虛米價踴貴災荒流行折色關支何益實用况
查存下客餉數多合無照近行出陳易新事例使
舊者雖支新者有積邊儲既足邊備自修以戰則

有資以守則可久以之加兵則不憂乏食以之興
作則無不赴功守土庇人莫急於此伏候

命下移咨督撫會議施行併乞

上裁

題爲集衆議陳愚見以裨營務事案呈到部看得
巡視京營吏科左給事中王 江西道監察御史
李 條陳七事內除恤軍士係戶部處弓箭係工
部各掌行移咨該部徑自議覆外所據分營操選
官屬習騎射重新馬厯出防五事俱于營務各有
裨益合就開立前件議擬上

請定奪等因萬曆六年正月二十日具題二十二日
奉

聖旨依擬行欽此

計開

一議分管操

前件臣等看得教兵之要貴於操練操練之法貴於精嚴三管分操雖爲舊制而合營團操以便簡閱亦先年巡視科道等官之建白也今以軍士日衆至於十萬一管之內簡稽難周演習不便所議分部操演不爲無見但查近歲合操之後各營廳房坍損頗多戰車營房俱造五軍營內修葺增置動經歲時及照營規名雖合操而分營細練亦自

不廢合候

命下備行總協及巡視科道等官查照所議督率各該將領嚴行訓練務使分合有方行伍整肅毋相混淆明行簡閱則雖合猶分矣如果當分總協大臣不妨再議

請奪伏乞

聖裁

一議選官屬

前件臣等看得軍必擇將將貴得人然後以戰則

勝以守則固所據各營雖有主將總領而傳宣號
令擺列隊伍必資中軍千把總等官責任之重不
獨戰車爲急城守皆不可忽相應依擬合無備行
總協大臣即將三大營中軍千把總等官逐一揀
選分別勇藝隨宜器使其才方綿弱者徑自斥退
固衛另行選取固不得備員車戰以損威嚴亦不
可濫充城守以示卑弱其操演閱視日期并示賞
罰等項悉照原議施行伏乞

聖裁

一議習騎射

前件臣等看得馳逐合戰騎兵爲最今雖有選鋒大半無馬則是徒負虛名無裨實用旣經各官具題前來相應依擬但查戰兵選鋒三千數內有馬七百六十八匹車兵選鋒二千數內有馬一百九十四匹通共少馬四千餘匹今太僕寺堪兌馬匹僅一萬八千年例先給約有三千之外而一歲所入本色未足相當若使四千盡兌則所餘無幾合無備行總協大臣行令該營即查選鋒五千數內

量派步騎兵各二千五百內除先領馬匹共九百六十二匹外其無馬騎兵一千五百三十八名造冊送部劄行太僕寺調充餘下步兵二千五百仍俟萬曆七年以後逐年增派本色以漸請給務足五千之數其新充馬一千五百三十八匹草料候給領之日咨行戶部查發其習騎射汰老弱選精銳俱如議行伏乞

聖裁

一議重新馬

前件臣等看得寄養馬匹出自民力官軍先給未
幾旋即倒斃者誠爲可恨但查題

准事例各營倒馬官軍照依年分追椿其新馬槩令
買補本欲責成喂養尤恐倒斃由于不測貧軍遺
累難支合無仍照舊題事例量追椿銀仍備行戎
政衙門督令各該管官嚴責各軍用心喂養不得
作踐致損其應賣老弱馬匹移文巡視科道及太
僕寺每于驗烙之時或如議穿左耳或烙以火印
如遇營馬倒死掛號巡視衙門設法查驗倘有抵

換即便拏究該管官員一體查叅庶于情法兩便
伏乞

聖裁

一議罷出防

前件臣等看得卒不服習是以卒予敵先年議撥
戰車營兵二枝分戍薊鎮更代往來不徒藉以出
防亦欲其習見邊事作其驕惰也所據山徑巖崎
跋涉勤動以戰則今無可觀以力則推挽甚苦所
議暫容休息誠爲有見但非虜款

真邊境雖寧修戰修守何可少懈况查各鎮邊防
分布疏內各軍派有信地似難遽議撤回合無備
行勦鎮軍門於分戍之兵憫其行役優加撫恤使
無祈父之怨其出戍車兵推挽艱難人多不便或
停車不發該鎮造車給與果否可行仍加議處咨
部施行伏乞

聖裁

題爲條議邊方切要事宜以裨安攘事案呈到部
看得陝西巡撫董 條陳六事除設府佐添州佐
改兵備係吏部改鹽引係戶部各掌行俱移咨徑
自行議覆外所據改副將換班軍二條俱於邊務
有裨合就開立前件議擬上

請定奪等因萬曆六年正月二十九日具題二月初
二日奉

聖旨依擬行欽此

計開

一議改副將以便調度

前件臣等看得洮岷河階俱與番鄰谷設叅將分路保障遇有緊急徵動援兵聽固原總兵調遣本爲得策但相距千里遥制實難洮州去河階二州俱四五百里道里適中應援爲便若使叅將職級相等委難約束所議洮岷叅將改副總兵照舊應援安會河階二路叅將悉聽節制居常則整飭兵戎各自爲守不得干撓遇警則督令調遣併力共戰聽從節制雖官名稍異事不更張相應依擬令

候

命下就將洮岷叅將改副總兵職銜及查陳守義年資尚淺未可遽陞但更革之初體統宜重以便行事合將本官即加副總兵職銜責令久任本部定擬責任各另請給

勅書欽遵行事凡湊足兵馬支給糧料及相見禮節等項備行該鎮督撫官查照原議徑自施行伏乞聖裁

一議擬班軍以便戍守

前件臣等看得徵發軍士道里貴約今據前議真
足以體悉人情省約糧餉相應依擬合候

命下備行陝西督撫官查照所議即將岷州衛備禦
涼州班步軍內摘撥四百五十名改調階州常川
駐劄一切操練分布月糧撫恤等項徑自酌行其
原調秦禮軍士五百七十名仍回原衛所改爲涼
州備禦班軍上班之日照例責令分巡隴右道揀
選起發務要盛甲鮮明器械齊整違者聽其肅撫
按照例參究伏乞

聖裁

奏草

卷之二

五十五

木

題爲優叙監市效勞酋首議處進

貢馬匹輪更市廠以示羈縻事卷查萬曆三年十月內該陝西督撫官石 等具題甘肅開市事宜本部覆議即於甘鎮邊外擇離內地遠處置立夾廠着令西海丙兔等酋每年赴彼互市一次松山賓兔一枝亦許歲在莊浪小市一次等因題奉

欽依通行欽遵去後今該前因查呈到部看得總督陝西石 題稱西海酋夷丙兔台吉等九名互市恭順及進

貢馬一十匹應照上年事規留邊給軍併

請賞賜及稱松山酋首賓兔台吉部落小市自萬曆六年改在高溝寨地方互市以後與鏵尖墩每三年一次輪流開市一節除各虜馬匹賞賚係禮部掌行移咨徑自議覆外爲照甘肅一鎮南番北虜路止一線備禦防守不可不嚴及查本部前議互市處所只許邊外隔遠內地置立市廠今據所稱賓兔台吉小市向在鏵尖墩互市三次爲以地方貧窮欲要改在高溝寨買賣二年一次輪轉無非

以邊地瘠薄人民稀少爲此更番之舉以便華夷
之情亦屬可行但事係邊關夷夏之防全在督撫
經畧處置本部難以遙度旣該彼處督臣具題前
來相應依擬合候

命下移咨新任總督陝西軍門會同甘肅巡撫仍查
高溝寨鐮尖墩兩處地方離邊孰爲遠近彼此互
市三年一輪果否華夷兩便如果虜人絕窺伺之
奸居民無警擾之患即照議徑自施行等因萬曆
六年正月二十九日具題二月初二日奉

聖旨是欽此

題爲嚴緝礦徒以安地方事案呈到部看得河南撫按官右都御史周 等具題前因率謂山西平陸等縣竊礦之徒多由本地奸民勾引窩藏乞要行令山西撫按等官嚴禁仍於沿河北岸要害防守擒拏一節所據前項礦徒來自河南者多由山西人爲之窩藏住於山西者多勾河南人爲之黨與彼此連結貽害地方本部旁求弊端謂須通行申飭已經奉有

欽依移文該省及山西陝西去後今該前因恭候

命下移咨山西河南各撫按衙門督行守巡兵備各道嚴行臨河近礦軍衛有司掌印巡捕等官查照先題事理着實遵行在山西者禁其渡河而南在河南者截其渡河而非無事則各嚴防守有警則互相勦除仍專督各州縣掌印官嚴責山谷土著居民恪守禁諭不許勾引窩藏自取罪累等因萬曆六年二月初一日太子太保兵部尚書方 等具題初三日奉

聖旨是今後凡有盜賊生發事關隣省的都着照近

日江西湖廣例彼此約會協捕務期盡絕事寧一體叙功論罪不許各庇所屬推諉僨事欽此

題爲恭報北虜西虜貢市已竣遵例議叙效勞官員乞

賜恩賚以示激勸事案呈到部看得總督陝西尚書石
題稱北虜西虜貢市已竣安靜無擾延寧二
鎮各效勞員役昨歲三貢互市再成已經陞錄甘
肅鎮互市在後今歲方係三次要將甘肅巡撫候
特加優賚寧夏巡撫羅 延綬巡撫宋 所當優賚

總兵官程九思張臣白允中副使姚 胡 李

張 叅議解 郎中譚 併加優賚副使殷 叅

議張經市三次重加優賚副總兵陳銳盛愈謙
經市三次併行優賚原任總兵官張傑等俱應併
賚原任總兵官劉承業等互市三次仍應優賚副
總兵聶大經等俱應厚賞原任守備都司中軍陳
達道等仍應優賚各鎮旗牌官張雲漢等俱應量
賞其餘承委官役張繼芳等俱不逐名煩瑣議
請通聽各鎮撫臣犒賞及稱遵奉

明旨不敢議陞惟通丁人等備歷艱辛比照各官不
同今通丁宋敖埏等准給冠帶小旗擺忽等量陞

職級惟復止議給賞吏部原撥書吏梁鍾等照例
量賞各一節爲照犬羊之性驕悍難馴貿易之事
紛競易起乃今華夷雜處帖然不爭若非撫馭得
宜何以有此所據總督尚書石洞識夷情經營
市事威惠兼盡心力俱勞例應首叙巡撫侯羅

宋同心區畫協力撫綏信義外孚勲績並茂
均應併叙內侯經市三次獨積年勞尤當優叙
其餘大小各官或典司貿遷而出納平允或防範
市廠而晝夜戒嚴效勞惟均恩賚宜及再據通丁

討給冠帶職級近奉

明旨市完不許陞錄似難再議合無念其往來勤苦姑准榮身既該督臣具題前來相應酌處合候

命下將石 侯 特加優賚羅 宋 同加優賚及

互市三次殷 張 重加優賚程九思等及互市

三次等併應優賚張 等及互市三次陳達道等

優賞其餘副總兵等官聶大經等併賞旗牌等官

張雲漢等量賞通下宋敖等准給冠帶小旗擺忽

等量陞職級惟復遵照

明旨亦各行賞其書辦等役併承委官役人等通行
總督陝西軍門查照原議公同各鎮撫臣動支官
銀照例徑自分別犒賞但

恩典出自

朝廷臣等不敢擅擬伏乞

聖裁等因萬曆六年二月初三日具題初五日奉

聖旨石茂華侯東萊各賞銀叁拾兩紵絲二表裏羅
鳳翱宋守約各二十兩二表裏殷仁張九一各賞銀
十五兩程九思陳銳等各十兩張傑等陳達道等各

八兩聶大經等張雲漢等各五兩擺忽周東各陞一
級宋敖坦等准給冠帶其餘依擬欽此